Peem's hair restorer.

This is just a farrage of nonsense, but believe it or not I have heard the remedy given in the song put forward seriously as a cure for baldness.

Peem wis a fine upstandin chap An he wisnae aw that auld. But afore he got tae forty He had gone completely bald.

O coorse, Peem took this gey ill oot, For he thought it wisnae fair That yin comparatively young Should go devoid o hair.

He went in for a hair transplant, But the transplant widnae root. They dibbled hair in here an there, But it withered an fell oot.

He got stuff fae he chemist That did nuthin for his looks, For when he rubbed it on his heid His skull broke oot in plooks.

He got ointment off the internet, But he only yaised it yince; For his chrome-dome burnt till his cranium turnt Like a pund o raw steak mince.

An then he heard an auld wives tale They swore wuid aye succeed, That a sure cure for his case Wis tae rub hen-shite on his heid.

Sae he went tae see a pal o hes That kept a wheen o chickens; An he bocht a bucket o hen-pen – An here's where the plot noo thickens.

He rubbed it in baith nicht an morn, Although it quite annoyed him Hoo aw his freends at work an play Noo tended tae avoid him.

Twice daily for a month or mair He made the application, Till yin mornin fae the mirror He jumped back in consternation. Though every law o nature Sic an outcome shairly flouted, A muckle bricht rid cocks-kaim Fae his heid by nicht had sprouted.

By the weekend a bonny wattle Hung fae either cheek By Monday mooth an neb had fused An grown intae a beak.

On Tuesday something warm an hard Rolled doon his trooser leg, An Peem fund tae his horror That he'd laid a bluidy egg!

And up until this very day Puir Peem like that's been stuck; An if ye meet him, aw he'll say Is, "Awk tuk-tuk-tuk-tuk!"

An sae, friends, if ye're growin bald It's best tae juist accept it, An weir a hat upon yer heid Tae warm it an protect it.

A baseball cap will dae the trick, Still better if ye have a Trilby, stetson, or tweed bunnet Or a knitted balaclava.

O vanished youth ye shouldnae dream, For that there's nae remeid. If tempted, juist you mind on Peem, An the hen-shite on his heid!